

Smisao reforme policije je da BiH postane sigurnije mjesto za život

Što se ranije postigne sporazum i izvrši reforma policije, to će vlasti u Bosni i Hercegovini prije moći da se efikasno bave rješavanjem kriminala, piše visoki predstavnik i specijalni predstavnik EU Christian Schwarz-Schilling u sedmičnoj kolumni koja je danas objavljena u štampi u BiH.

Christian Schwarz-Schilling je primjetio da su kontroverze koje je uzrokovala nesaradnja Vlade Republike Srpske u radu Direkcije za reformu policije potisnule u drugi plan činjenicu da rad Direkcije ima za cilj oslobađanje građana BiH strahova da će oni ili njihove porodice biti izloženi napadu, da će im stanovi biti opljačkani ili automobili ukradeni.

“Svrha restrukturiranja policije je da se građanima pruži bolja policijska zaštita. Sasvim jednostavno”, piše visoki predstavnik/specijalni predstavnik EU u članku koji je istovremeno objavljen u *Dnevnom avazu*, *Nezavisnim novinama* i *Večernjem listu*. “Svrha procesa koji je u toku u okviru Direkcije jeste da profesionalci u ovoj oblasti predlože najbolja tehnička rješenja za reformu policije”.

U oktobru 2005. godine, državni i entitetski parlamenti potvrdili su Sporazum o reformi policije koji predviđa osnivanje Direkcije za reformu policije i restrukturiranje policije u BiH u skladu sa tri principa koje je utvrdila Evropska unija. Christian Schwarz-Schilling je podsjetio čitatelje da su tekst ovog sporazuma predložili Milorad Dodik i Dragan Čavić.

Evropska unija se saglasila da će pokrenuti pregovore o Sporazumu o stabilizaciji i pridruživanju (SAA) nakon što sje bila uvjerena, putem Sporazuma o reformi policije, da su vlasti Bosne i Hercegovine ozbiljni u namjerama da se bore protiv kriminala.

“Dovodeći ovaj plan u pitanje, vlasti Republike Srpske riskiraju da dovedu do odlaganja potpisivanja Sporazuma o stabilizaciji i pridruživanju”, piše visoki predstavnik i specijalni predstavnik EU. Oni također podrivaju napore – uključujući i njegove – za liberalizaciju viznog režima za građane BiH.

Christian Schwarz-Schilling je pojasnio da će reforma policije ponovo doći u arenu političkih razgovora tek nakon što Direkcija okonča svoj rad.

Potpun tekst kolumne koju piše visoki predstavnik i specijalni predstavnik EU.